

四庫全書

集部

欽定四庫全書

集部

唐愚士詩卷

二

詳校官編修

臣曹

城

中書

臣

劉源溥覆勘

總校官進士

臣

朱鈐

校對官助教

臣

羅萬選

謄錄監生

臣

羅翹遠

欽定四庫全書

集部六

唐愚士詩

別集類五明

提要

臣等謹案唐愚士詩一卷附會稽懷古詩一卷明唐之淳撰之淳字愚士亦以字行山陰人肅之子也建文初詔詞臣修鑑戒錄方孝孺薦之授翰林院侍讀與孝孺同領書局卒於官明史文苑傳附載王行傳中徐禎卿翦

勝野聞載明太祖以布囊貯之淳夜越宮牆入便殿點竄十王冊文一事其事荒誕不經殆委巷小人因之淳文思敏捷造是妄語張芹遺忠錄稱洪武中有薦之者謝不就曹國公李景隆俾其子師馬征行四方皆與俱歷燕薊秦周覽前代遺蹟援筆而賦凌轢一時考明史李文忠傳景隆以洪武十九年襲封曹國公不載其北征事惟馮勝傳載洪武二

十年與傳友德藍王趙庸等北征常茂李景
隆鄧鎮皆從是年歲在丁卯與集中寓寧軒
記所載洪武丁卯相合當即其時也是集僅
其丁卯戊辰二年所作似非完本又詩文相
間成編而總題曰詩亦非體例疑當日雜錄
手稿存此一帙後人因鈔傳之故編次叢雜
如此歟其詩雖未經簡汰金礫並存而氣格
質實無元季纖穠之習其塞外諸作山川物

產尤足以資考核會稽懷古詩一卷乃其少
作凡五言古詩三十首題下各有小序仿阮
閱曾極張堯同之例其中如舜廟不取地志
象耕之說禹廟不取禹穴藏書之說皆為有
識此卷本於集外別行然篇頁寥寥今綴於
集後末附長洲戴冠和詩三十首大抵湊泊
成篇不及之淳原唱以舊本所有姑亦並存
馬乾隆四十六年十月恭校上

總纂官

臣紀昀臣陸錫熊臣孫士毅

總校官
臣陸費墀

欽定四庫全書

唐愚士詩卷一

明 唐之淳 撰

出京師述懷

丁卯二月十三日
以下皆道中作

辭親戒行李祇命出神京
念茲行役遲遙睇前旌
皇仁固無外所怒不來庭
授鉞必衛霍獻謀必良平
旗旌耀日色饒吹雜風聲
飲馬河流渾磨刀山石腥
野有貌虎勢川無蛟鱷
驚況當青陽節卉木競敷榮
晴雲布

魚麗美柳轉倉庾士健衣有輝牧肥草青青狼居行可
陟祁連待勒銘豎儒際斯盛何以副從征

清流關曉望

星河不動曉蒼蒼淮楚人烟接混茫客路風光未寒食
馬頭山色又滁陽車書人物今王業禾黍桑麻古戰場
北望天兵四千里貔貅萬騎儼成行

到鳳陽奉呈南潤公

行役到淮甸重經感歲年雞聲猶郡郭草色自人烟訪

古山河在思親涕泗懸南來愁跨馬北去喜乘船便續

淮南賦仍歌

闕

篇山前誰杜甫槎上或張騫祇覺心

非石徒教髮變玄風依沙寺泊雨借驛樓眠燕社迎沽
酒鶯春促換綿錦翻花藹藹茵細草芊芊飽食王孫飯
寒分貴客羶從容酬白晝出處任蒼天

奉和南澗公送別之韻

自甘天地一閒人偶得從遊南澗濱吟到好風兼細柳
錦囊字字合陽春

留別南澗公

幾迴投筆厭窓雞今日雲邊入馬蹄
欲赴陳王燕平樂還同李愬入淮西
羽書烽火三方靜紫塞黃河一路題
喜得寵行詩句好船頭夜夜爝虹霓

長淮船

長淮船淮流不斷船連連二月三月天
不雨鵲鳩晝啼楊柳烟淮東土乾無麥
田淮西魚賤不論錢但祝好風行十日
魚羹飽飯枕書眠

泊五河縣

夜泊淮堤近五河惡風吹面歎蹉跎青山更比吳中少
綠浪翻同漢水多去國何須事弓劍思親有淚落烟波
三千里外江南客却倚月明聞楚歌

過盱眙舊縣懷南澗公

舊縣新城取次過百年世事幾風波掛帆客過沽春酒
復業人歸理釣蓑山水未生淮白少暮雲欲盡海青多
客懷不及南飛鴈也逐閒鷗到澗河

喜雨

歸來鴈影中流見
過去鐘聲兩岸聞
日沒山青星斗黑
小龍將雨嫁春雲

水生華發草蓂蓂
春半人家未浴蠶
一夜雨聲淮泗白
却疑蓬底睡江南

舟次龍渦驛

龍渦驛對鳳凰洲
五色雲中玉氣浮
今日已為湯沐邑
分明千古帝王州

泗州

飄飄帆席去如馳坐倚船窓看晚炊
河口驛亭題泗水
山頭縣郭認盱眙當年楚漢興亡處
今日風雲際會時
已築祖陵開寢廟黃童白叟望旌旗

項王城

泗州城北項王城千古令人歎未平
韓信歸劉知有主
范增辭楚計無成
江淮不洗英雄恨
魚鳥猶疑叱咤聲
欲喚春醪奠遺跡
風帆催客赴脩程

韓信城

雉堞平來事已休
淡烟芳草一荒丘
蒯生不作忠君計
呂氏方為少主憂
烹犬有時應自喜
縛鷄無力豈長謀
泗河兩岸離離石
留與行人繫晚舟

二月十五日抵宿遷

長河得天風掛席
夜叅半篙師喜利
涉卧客生驚歎空
明沂流光滉漾入
雲漢心同雙攄爭
思逐羣波亂春熱
減衣衾川鳴起鵝
鴈已從桃源辭方
謀宿遷飯

泗州第一山追和米南宮韻

書畫船從此地還雲霞草木盡毫間江淮多少名山水
此是君家第一山

舟中對花

河畔莊前無數花折來船上飲流霞故園亦有如花樹
爭奈開時不在家

呂梁洪

三月上呂梁春旱水未駛水中半白石錯出犬牙銳其

流本閒暇急束若有恃乍疑雲漢瀉星斗濕流麗又疑
滄海濤噴射巨鰲背轟轟萬雷撞佶佶千兵勢為河作
戶限匪一乃再至上洪急且紆下洪峻而厲舟航抵其
下一葉舞雲際躋攀僅分寸失手尋丈外纍纍腰巨
絙牛喘僕夫瘁已涉未足懼欲下心反悸胡然造次頃
號叫乞神惠遂令愚無知諂祭及非類方今幅員廣南
北一衣帶梯航極山海珠玉兼象貝設官使居守人畜
數十輩蛟鼉革冥頑行旅釋凝滯人心既有依天險不

足畏緬思黃河源遠自崑崙致萬里不能休朝宗實天
意向非神禹功後世亦奚賴到今疏鑿處歷歷猶可記
河竭功不忘聖人等天地

金龍祠曲

金龍祠前春草綠金龍祠中人簇簇上洪人祝上無灘
下洪人祝下平安龍語不傳環玦喜牛馬輕便舟楫利
龍君繡旂赤羽旗龍女朱冠金鳳衣願龍順人人不怨
行人歸來賽龍願

呂梁廟

呂梁廟中何所祠漢有關侯唐尉遲二公生世本英特
死亦令人俎豆之當其二主興家國秦王即是劉玄德
壽亭不遇鄂公遇事在天為豈人力黃河之流聲徹天
二公廟食千萬年不知何年創祠屋臨風為取荒碑讀

徐州黃樓

嘗讀子由黃樓賦每恨不作彭城遊今來繫船覽城郭
殘山剩水令人愁人誰其人我所求樓非其樓名則留

煙消雲破見斜日水落石出如清秋長公治世才最優
歛此大惠施一州不著絲綸玉堂署要洗鞞鞞渾河流
心存赤子天為助手却河伯人無憂功成事定作宮室
醞酒賦詩相獻酬一時寧知著千載兩賦直可回萬牛
倚闌擊節懷遠謀東風飛來雙白鷗臺沈戲馬登狐兔
樓空燕子鳴柔鳩雄圖伯業等塵土獨有文事歸山丘
意公魂魄常夷猶化為千尺之黃虬與波上下浴日月
鎮遏巨浪同浮漚登臨不盡且北去回看釣艇弄滄洲

沛縣歌風臺

河流西來復東注我方乘舟北河去長塗短服春已深
小邑孤城日將暮河傍穹碑倚春樹停撓一讀知其故
不見高臺號大風空餘草屋連荒戍當時漢祖居沛中
時有雲氣隨飛龍道間未斬白帝子圯下已逢黃石公
子嬰首落重腫手百二山河外金有陰陵失路豈人為
鴻門不死真天授殘忍者滅仁義王威加四海歸故鄉
籜冠魏我筑聲壯日月照耀旌旗揚身中袞裳朱衣繡

酒酣歌舞爭為壽。父老人人被寵恩。租庸世世蒙蠲宥。
云胡伯心猶未忘意。氣激烈非虞唐不歌艱難創王業。
却思壯士守邊疆。臺前風烟起天末。臺下寒流動毛髮。
黃昏不敢問前途。駐目更看芒碭月。

清明日

不覺離家月再圓。船頭挿柳記流年。短衣烏帽四千里。
落花游絲三月天。夢裏松楸隔吳越。眼前行李到幽燕。
流光倏忽不相惜。幾時歸種山陰田。

泊兩河口

疊浪龍鱗合，雙河燕尾分。
繫船歌野樹，炊飯煖春雲。
雞唱荒村得，沙崩永夜聞。
明朝逢改火，熟食侑芳尊。

鄆城縣

廢塔千年寺，荒城有數家。
行行過村落，稍稍見桑麻。
薄酒高論價，輕舟淺閣沙。
無言對春晚，獨立數殘花。

壽昌驛

細雨止復落，遠山看更無。
樹光連墅迴，人影共帆孤。
縣

遠先逢驛河窮欲問湖不知齊魯近祇覺語音殊

安山湖口阻風

昨日清明今日風安山湖中浪拍空日輪無輝太陽怒
蛟鼉舞波魚眼紅小船漂搖大船立三步回身五步揖
雪色遙將澥渤翻雨聲暗入龜蒙濕馬上行人沙沒脰
搓頭漁子雙緡盡鴛鴦翅薄不禁寒楊柳絲長弱難定
我家賀家湖水隈浩歌欲上黃金臺南風苦少北風急
二月已過三月來吳雲迢迢天際白燕樹沉沉望中黑

安得飛章訟風伯
塙首天閭三太息

次日過安山湖

泰山兼魯望積水與河通
月白開鮫室天青出貝宮
舟航雲物外郡邑有無中
旅泊無愁晚終宵野燒紅

三月十五日夜對月

春來海月圓三度
一月一圓看一處
吳城雨落燈花稀
淞水風高花滿樹
那知今夜客東昌
蓬窻坐納星斗光
月侶兩人還對影
人看三月轉思鄉
鄉路四千雲漢外

後夜月圓何處在
安得月圓長不虧
我身在家無別離
懷鄉中舊游

年年出郭送殘春
短履輕舟四五人
鬪草賦詩分險韻
折花行酒記多巡
山從薦塢看青靄
水入梅溪采白蘋
今日春歸身是客
天涯相憶淚沾巾

過張秋傷河決都水監

可憐都水監無復
漢官儀洲渚沈遺跡
魚龍識故碑
日斜漁唱斷風細
客帆遲前代多耆舊
時來詠黍離

四女樹曲

故城北邊古槐樹樹傍有祠祠四女人傳四女初種時
誓教一心千萬枝到今綠雲垂髮鬢正如姊妹梳頭坐
密影輕移舞袖翻繁英暗識歌塵墮皇英紫竹吳姬草
血淚愁心入穹昊何如此樹無所思枝枝葉葉不相離
樹頭不宿孤飛翼蝴蝶鴛鴦戲春日樹下人來掛紙錢
葉映新粧好顏色願得女工織巧蠶倍收年年女伴賞
春秋

夾馬營

船頭鼓鳴遠洲曙起行夾馬營東路路傍旗影成樓風
樓下人家綠楊樹憶昔紛紜五季中九州割裂爭羣雄
天子深宮禮清夜人間勺水浴真龍龍光燭天香繞室
三百餘年基一夕檢點初歸大耳公黃袍已兆陳橋驛
後來二主墮危機東南數星如奕棋聽徹行都六更鼓
不思藝祖一戎衣宗社既亡元鼎失此地淒涼但荆棘
明月微連鬼燐青流水寒通汴河白櫓聲軋軋日東西

弔古無人鳥自啼我欲悲歌不能去獨倚營東聽馬嘶
直沽見潮

我家東海頭門前潮水鳴朝昏自從江淮來不聞潮聲
見潮痕別淮入徐沛日日對黃河河流渾渾東到海我
不如何愁奈何河中半月餘逆流千載折南風喜人北
風怨憶著潮聲夢吳越下水復上水行行抵直沽我家
門前舊潮水忽復見之當海隅憶我去家正月末桃花
水生洲渚闊今我憶家春欲歸月缺半圓潮水落潮落

當更長月缺當更滿月色潮聲無盡時天地久長人世
短明朝又北去見月不見潮潮頭有魚好寄信欲持尺
素託波濤

楊青驛

楊青驛前楊柳青馬頭南去船北行北方土寒春尚淺
三月盡時鶯未鳴倚馬停舟競攀折青絲絡手花飛雪
人心自爾憶鄉關柳色何曾管離別草木無情是楊樹
莫種驛亭分別處舊愁新恨幾時休前頭又入楊村去

送陳中復先生

水國春雨鳴雲開遠洲曙
帆檣載風色言指東霞去月
落蔣陵鍾潮生越江渡方忻
盍簪樂欲別愁反遽

贈嵩陽道士

道士嵩陽住前年闕下來
方腫能鑒識短幹不驚猜每
出淮王邸還過簫史臺
韓湘名豈幻曼倩語兼詆禦臘
作薪火休糧是藥材
松將枝作蓋棗用核為枵
方死三尸泣詩專八斗才
送人時借鶴乞雨或分雷
玉節秋朝

帝黃芽夜結胎丹燒葛洪竈韻寫野王堆海信青童得
春衣玉女裁愧予知守北求道未逢媒五石飢難飽三
華凍未開相期游汗漫從爾到蓬萊

題夏山欲雨圖

雲濕樹陰稠山炎雨氣浮暗邊疑鴈蕩佳處失龍湫舟
楫荷華晚川原稊黍秋空憐頭上黑詩句若為酬

題夾竹桃花圖

青泥白石淨無埃碧雨紅霞次第來可是瑤池春醉裏

借騎阿母小鸞回

泗州舟中懷鄉友

年時憶友在吳山只隔錢塘一水間今日獨看淮泗月
千山萬水不知還

豫河舟中

豫河曲北運河多水轉灣碕疾似拔直港得風斜港背
櫓聲帆影兩相和

通州行營

三月二十
二日到

兩河樓櫓枕孤城四野貔貅列萬營
飲馬直疑天漢落揮戈可使塞雲平
三春日裏旌旗影五夜風前鼓角聲
北去塞塵無朔漠南來王氣有神京
玉門都護傳書至羽扇將軍草檄成
社稷山河開帝業烏蛇龍虎識天兵
令嚴步武威容盛夕報烽烟氣候明
佇看長驅清瀚海始知臺閣著勲名

奉和春日汴河即事之韻

百年形勝幾風塵此日昇平氣象新
月裏鼓鐘官寺晚

金瓶梅詞話卷一
鷗邊楊柳故宮春
停撓老客經遊少
橫梁將軍感慨平
惟有懷陵芳草色
東風依舊綠如茵

和顧菴安山湖對月之韻

月白際高天
波明滅遠川
風聲羌管細
星影酒杯圓
去鴈穿雲幕
驚鷗響荻鞭
將軍占破敵
太白更西邊

和顧庵登東昌忠愍閣之韻

重重城闕擁層臺
畫棟雕闌四面開
海岱浮雲疑地湧
旌旗拂日自天來
平田斷隴參差見
細柳柔桑取次栽

過客登臨能作賦，懸知獨有樂天才。

別家

以後途中
前後作

遠別辭親苦念家，馬頭明日是天涯。
牀前小女知人意，也學悲啼向阿耶。

出都門

欲拋筆硯學從征，跨馬彎弓事事生。
今日都門辭別去，春風一路入幽并。

江上

山峯如馬浪如龍
巴雪消時春氣濃
萬里順流東到海
石頭城下合朝宗

江帆

輕輕冉冉又蓬蓬
十幅齊開面面風
望沒牙樯人去遠
碧山盡處影孤鴻

狀春

浮萍錢小穿蒲帶
楊柳眉長妬杏腮
北雪乍消鵲鵲觀
東風已入鳳皇臺

賞春

日日東風處處春
六街車馬蹴香塵
曲江水滿花如錦
留與陳王賦洛神

新月

素娥新畫半彎眉
丹桂花開向北枝
街鼓未鳴人未絕
清光雖好不多時

聞曉角

吹沉玉兔是金鷄
調苦聲長思轉淒
馬上騰騰殘夢裏

不如聽得在遼西

二月望日

蝶衝花雨燕爭泥
晝夜相停漏刻齊
心在故鄉身在客
不寒不暖過淮西

歎花

一簇春心鬪晚粧
凌波妬月暗生香
多情莫上朱樓望
金谷佳人恐斷腸

淮上漁者

八尺長竿一具罾前船相喚後船應得魚換米兼沽酒
更取魚油作夜燈

芳草

遠拂青霞軟簇茵壞宮荒寺一時新謝家詩句王孫賦
不解迎春是送春

黃河晚渡

下馬垂鞭更整衣晚風吹面不多時打將雙棹過河去
新月已生楊柳枝

金瓶梅詞話卷一
郵亭殘花

紅紫無多嫩綠肥
五更啼鳥怨春歸
都緣來往人攀折
不為風搖雨打稀

對花不飲

好花名酒兩堪誇
酒面花容一樣霞
昨日飲多花笑酒
今朝病酒笑看花

竹枝詞

黃河所見

春來日日起狂風
不分南北與西東
行客怕風兼怕水

幾時上得呂梁洪

為防瀨子向中流外倒風多裏倒憂莫道路途行不順

邳州徐州又濟州

前船夫問後船夫爾在河南運米無九十石糧車十輛
幾多牛疋幾人驅

新黃河接老黃河河上船同蟻陣多一派棹歌天上落
分明口口歎阿過

金龍王廟在河干割羊燒酒上杯盤乞得好風行半月

歸來廟下賽衣冠

挂帆撾鼓響耽耽南船北船密如蠶往日南人齊赴北
如今北客盡朝南

南客新來北地居莫因葦菜憶三吳
榼子酒勝桑落酒
槎頭魚賽細鱗魚

三月三日

自別鄉關已月餘可堪稔日尚南徐
我家正在蘭亭下
曾有流觴念我無

使風

潮勢風生兩岸平
船船催著掛帆行
便須飽飯看書坐
坐近船頭聽水聲

阻風

三日北風吹不休
一時南客盡停舟
可憐同在江湖上
得去心懽未去愁

買酒不得

村頭小店不多沽
過午尋來即道無
萬斛詩愁澆不得

未緣今日是三閭

獨鶴

一辭伴侶出仙宮
孤宿孤飛任碧空
昨夜月明遊赤壁
舟中逢著大蘇公

廢寺

雨沉畫壁火燒碑
白髮殘僧問不知
惟有當年駕經鹿
時來偷飲碧蓮池

遠興

漢家新築受降城
沙漠長驅百萬兵
不為三邊勞戰伐
須知四海慶昇平

春思

看盡梨花到柳花
春光只為馬頭誇
有時吟斷無尋處
小巷東風燕子斜

陌上暮春

鬪草聽鶯非我事
傍花隨柳亦閒人
如今去作扁舟客
燕趙江淮過一春

金瓶梅詞話
卷一
隄上行

桃枝著葉楊枝軟
芹芽出土蒲芽短
隄邊人唱蹋春詞
河豚吹雨晴江暖

春夢

風沙三尺燕山夢
不夢燕山只夢家
枕上分明兒女說
阿婆意下瑞香花

晚雨

曉占霞氣晚溟濛
細逐輕烟響雜風
一點船燈人半睡

滿天曛黑不開篷

解悶

細傾金媪雙尊酒浪擬唐人七字詩人世百年今四十

大都難得是閒時

行次徐州忽遇金氏媪賣酒極佳

旅夕

風餐雨宿豈堪論夜夜船移處處村更有無情是明月
照人離色近黃昏

春興

金一
卷一
渴飲饑食睡起遲好山隨意看多時幾迴落日東風裏
船過郵亭總不知

渡淮有感

十年前問臨濠渡今日重登淮水船一片征帆沉夕照
兩行客淚落春天

從軍北征

曾向東窓事六韜擬將弓馬屬羣豪探兵已踏蔥河雪
刮寇當揮大食刀

春詞

淮東兒女十四五
掘菜條桑學養蠶
春氣熏人濃似酒
不曾飲去也須酣

寫情

濟上風烟汶上田
計程幾日到燕然
午來一覺江南夢
只在青山綠水前

晴景

蜂蝶飛來花滿枝
無風無雨兩相宜
紅霞照影宜春苑

金分四八
卷一
綠浪生香太液池

春夜聞笛

月涵河水水涵天
鄰笛聲聲起別船
更莫苦吹腸斷曲
從來孤客夜無眠

憶遠

良人遠戍玉門關
十度花開未遣還
但使報君心膽赤
莫教愁別鬢毛斑

鷺鷥

絲羞頂髮雪羞裳
歛翅凝眸立野塘
日晚蓮船驚起處
逆風飛去兩三行

遣懷

阻風中酒髮鬚鬆
寫字觀書事事慵
忽聽鐘聲忙睡起
海神廟下看迎龍

獵騎

汗血淋漓濕霧駿
聲嘶眼疾四蹄風
追鷹逐兔渾閒事
曾與將軍立大功

寒食夜

風定雲閒月倍明
水禽聲煖夜寒輕
禁烟不禁舟中客
留得春燈照二更

懷歸

側身天地雙蓬鬢
寄跡江湖一釣舟
今夜夜長長不寐
懷歸欲上仲宣樓

從軍行

都護書傳羽箭中
班生擲筆酒泉東
月支頭骨天驕臂

看取歸來第一功

鐵面將軍立戰勛
青袍儒士學從軍
擬歌吉甫興周頌
不數相如諭蜀文

塞下曲

玉勒新調宛馬駒
金甌細點野駝酥
夜衝虎口擒黃兔
曉過龍沙射白狐

石頭敲火馬跑泉
直過陰山路八千
不見長安惟見日
時將草色記流年

偶題

世上豈無飡玉法
壚中亦有化金方
不如去學劉玄石
一飲三年入醉鄉

舟中四詠

筆筭

昔向馬前奏
今來船上聞
分明關塞月
吹破楚天雲

鴿子

蓬畔養飛奴
如簷望却無
船人莫驚起
留得伴檣烏

燕子

止止復飛飛
依蓬更拂梳
秋風從爾去
船不到烏衣

黃犬

花畔偷眠日
蘆邊慣吠星
寄書多不達
煩爾到華亭

連窩驛次無名人韻

河連樹色涵清淺
雲漾天光照蔚藍
過午覺來貪覓句
欲呼杯茗漱餘酣

濟寧船上抄水馬驛程

昔愛山川不愛行小軒曾把卧游名于今忽作江湖客
却向舟中寫路程

通州立夏日作

涉春尚鮮雨入夏轉多風揚塵眯人目鮮雲麗璇穹夕
夜河漢白朝日旌旗紅驅馬出營門憑高望雲中草色
青萬里驚沙颯飛蓬靈景耀宇宙流光激烟虹天兵赫
以壯敵氣銷無容顧言屢薄姿翩翩送羈蹤孟陽舍吳
會南陸薊門東纓綈易介冑顏狀驚僕僮老親政在望

弱息未有從豈不懷所歸所歸我元戎

送陶宗亨回越

鄉中曾未識濟上忽相親舊有通家好俱為遠路人鴈聲連永夜柳色送殘春料爾南還日荷花照眼新

望北平

雨破晚風清依稀認北平臺空金氣滅河淨玉流明燕麥疎春雨鶯花簇故京因思山水郡南北總關情

四月十五日夜潞陽看月

前月在魯今在燕兩方對月非偶然人憐明月有圓缺
月光却與人周旋維南有箕北有斗箕翕其舌斗張口
我從斗口望南箕一身萬里方思歸

留別顧庵先生及李徐表高四公子分韻得朝字

自四月二十一日出
師以下詩皆軍中作

擬逐霍嫖姚翩翩北度遼揮鞭空月竈飛羽落天驕坐
見風塵息寧辭歲月遙惟餘親有念暮暮復朝朝

通州抵三河縣道上與李高二公子聯句

衆馬猶嘶阜荒鷄已唱晨

唐

烟銷明海日風暖送晴塵

李

旄管新翻調戎衣穩稱身

高

行看月三捷書奏達楓

宸

唐

三河縣送三公子回通州讀書

書生且逐三軍去公子還歸八魯莊
燈火夜窓聯句坐
惟應說著到漁陽

因公子却寄願庵先生

君留我去兩傷離一寸心隨萬馬馳
後夜天涯看明月

知君臨水正吟詩

薊州

薊州古漁陽地勢殊豐隆三河漾其西石門限其東兵
餘歲屢歟四野無恒農老少衣裋褐園廬缺垣墉况茲
久旱乾冬春苦多風小雨不破塊犂鋤詎能功麥秋未
舍穰苗田但高蓬竭來覽原陸匹馬方從戎解鞍憇官
舍綠樹空亭中有鳥鳴樹間其雌和其雄物性有至樂
人情懷苦悰疇能撫罷民和輯與鳥同張郭久不作高

山仰遺蹤

石門口

羽檄徵兵下朔方三軍已過古漁陽
天連沙草春無盡雪點周廬夜有光
後顧車箱疑甲第前驅馳馬若羣羊
據鞍莫賦從軍曲留記成功軼漢唐

松亭關

即喜峯口峯亦作
逢近亦名獅子峪

少弱不更事矻矻親簡編
武經既靡習文義亦固宣
忽值李輕車挾我越幽燕
辭親拜轅門下榻禮殊專
夕卧

薊北月曉衝灣河烟出入行伍間
招邀相後先時於壺矢暇共覽
穰苴篇儀容見新態魂夢生舊
憐今晨始出關回顧眇以綿豈
不念王愜私懷動中悵軍容賴
未光師克愧無鐫願陳征戰績
以付臺閣賢

寬河

鳴輦起前旌草白露未晞中夏
失炎暑曉寒尚重衣荐登楊柳
顛屢涉陰澗涯面黑衣有垢黃
沙正霏霏道狹師旅繁令嚴
部伍遲景晏未投營人馬同飢
罷鑕火爇

野草安能顧甘肥月出新築城四山若熊羆太白西方
高星宿光陸離欲飛還故鄉雲路風力微幸逢堯舜世
佇候河清期再歌六月詩惻惻有所思

黃崖白塔

黃崖壁立千萬尺色黃乃是中央德地當北塞壓玄冥
要使朔雲斂陰慝誰築浮圖如蟻蜂點綴霜雪縣虛空
健兒到來不敢視叫嘯山鬼訶神工我不知名問關吏
吏言昔有金仙寺長廊齋磬雜鐘魚焚香膜拜多豪貴

由來南北幾興衰
關山不殊人事非
區區一寺何足惜
萬里之城今屬誰

營中口號

曉問前驅晚問營
索馳牛馬一時鳴
貪依水草寧辭遠
恐濕旌旗却愛晴
燈火照山星萬點
箭籌傳令月三更
漁陽已盡遼陽到
早卜寧邊息戰爭

馬上

谷深風急帽簷斜
滿眼寒雲滿面沙
騎馬過山看不盡

更多芳樹沒人家

五月營門柳始華
新新草色舊人家
鄉山萬里誰相伴
惟有囊中日鑄茶

惠州

雨出薊北門已涉遼東境
驅馳未辭勞遇勝輒神領
惠州古名邦山水甚清緊
水無龜魚樂山有金銀鑛
龍蛇畫塔廟象貝充市井
一從桑海變此地為民梗
棄之蕃漢間清野絕巡省
孤螢敗壁光老樹頽垣影
方今紆聖

念規取作藩屏軍麾蔽沙漠築興遠近欲令斯民人
恢復舊風景愧予廁戎行登覽亦多幸夜中起長歎五
月尚寒冷時時見寶氣星斗吐芒穎平明更前驅秣馬
度東嶺

重午日道中

遼陽道上見端陽異鄉景物思故鄉漫將艾葉插烏帽
豈有菖蒲浮玉觴小雨暗空林麓黑飛沙漲川衣袖黃
此行已覺厭馳驟安得鼓棹歌滄浪

大寧

遼時昔有國憑陵我中華
中華豈無人養養如龍蛇
噬膚尚靡顧稱謂殊等差
皮幣歲不足視之若塵沙
我我大寧城蕭后之所家
晚節穢中冓牝雞鳴日車
秦國乃猶子貴寵莫與加
作嬪帝王室而乃事毗耶
範鍾創塔寺祝壽期無涯
迨今四百秋變滅隨雲霞
碑文蝕土翳隧道生蓬麻
萬室無一廛安能恤其他
空餘壞堦堞日夕啼寒鴉
仰懷慶歷間躑躅以興嗟

望遼陽

紫塞高峯積雪明
黃沙古蹟細烟橫
身從北地三都尉
目斷秦人萬里城
渡處水橫朝洗馬
望邊月黑夜翻營
遼陽只在雲山外
更入東風幾日程

野營曲

自五月五日至大
寧以下皆大寧作

野營無城復無柵
掘水為濠倚沙磧
烏旗焰焰起中軍
氊帳重重挿戈戟
帳前健兒椎大鼓
旗下才官設弓弩
烟飛礮火奪天星
風點拆聲傳夜雨
時將鐵騎哨東西

沙草生香入馬蹄
白狼河邊狐豕盡
紅螺山外雪雲低
就中借問何官屬
半是公侯半藩牧
聖人三殿授兵符
列校兩邊聽約束
幕府深沉晝刻遲
烽堆寂靜羽書稀
裏糧東甲行分壘
走狗呼鷹看打圍
東飛金鳥西走兔
九州四海皆王土
凱歸莫忘野營歌
歸向朝中作歌舞

途中覽古

滄海桑田幾陸沉
兩朝誰復問遼金
銅駝泣雨浮雲濕
石馬西風宿草深
城郭廢多空夜拆
人烟去盡滅秋砧

數行青史燈窗恨不及憑高見古今

述懷

沙場非故國壁壘非衡門乍習軍旅事耻無帷幕言曉
從驍將出飛鞚越平原晚逐偏校還星火散雲屯時維
斗插午尚襲貂裘溫輕雷始發聲零雨不及繁厓陰方
雨電馬首已升瞰顧茲寒燠異敢昧天地恩倦翮懷安
巢下泉仰高源微軀故有託夢寐徒騫翻側聞敵騎遁
萬里空藩垣譬之陽德輝陰翳無復存先聲貴有實未

德惡久煩冀全萍梗蹤歸養樂丘園

五月望夜六王川對月

家常見月望天涯及到天涯却望家
夜半覺來行帳冷流螢飛過石蓮花

沙場曲

沙場千里平如席中有黃沙圍古磧
一自承平二十年漢家不種邊城田
田荒地虛烟火歇荒塚麒麟望秋月
今年五月漢兵來氣吞瀚海聲如雷
聲如雷敵可却壯

金史卷一百一十五
卷一
士齊歌白翎雀白翎雀四海平玉門無壘黃河清男耕
女織休甲兵

寓寧軒記

洪武丁卯春正月辛未上命征虜大將軍宋國公左副
將軍穎國公右副將軍永昌侯左叅將南雄侯右叅將
東昌侯帥兵下朔方四月丁未出松亭關五月甲寅次
大寧大治其城垣為懷夷受降之地且將如此相機而
進也凡在師旅者皆露茨于野以須命時之淳從曹國

李公在行中幕府餘暇得構草屋若干楹於城西南隅
以庇風雨既成題之曰寓寧軒識其實也初上受天命
奄有四海不欲久勤我士民凡塞外地悉棄不郡縣而
彼邊圉亦畏威遠遁雖間入草竊終不敢私有我土宇
於是遼東西古北平之地往往清野數千里無雞狗聲
今上一旦惻然閔其處昔為中國乃今山川土田不收
不植不惟無以收輯我遠人抑亦有負我天地生人之
德矣是以有今茲之舉焉之淳越氓也遭逢聖明之樂

以一介書生從我公萬里外覽河山之勝弔前人用武之地因得發其感槩激烈之氣於文辭間詎非幸與維茲大寧實古東北夷白靄之界而契丹應天后蕭氏所家也其故宮壞陵狼籍荒榛霜雨中與夫官寺民廬頽垣廢址之出沒瓦礫者尚可想見其當日庶富之餘風焉斯軒也地勢爽塏庭牆井級皆循其初欲求其為何人之居為貴富為貧賤也已不可得但見環城諸山浮青沃黛起伏映帶蔚有殊態屈指而數之得大小之峯

百有八十焉晝夜多大風盛夏不見暑氣非亭午不少
熱值雨輒重裘不能勝非復南中風景賴有山可以寓
吾心思是則吾身雖寓於寧有若不知所以為寓者行
見德威所被流民四歸種落款附愛狐兔為牛羊化赤
地為沃野繼自今而來寓者耕鑿生息長為土著之民
吾則旦夕從公臥鼓偃旗凱奏京闕回視今日之居則
誠寓矣因記斯軒首述國家命將用兵之初意將書諸
石以告諸寧人是月辛未日唐之淳謹書

贈遵化縣義門劉善鄉

遵化城南五里賒前朝旌表舊人家門如彭澤惟栽柳
園擬東陵只種瓜耕罷兒孫牛背穩醉歸父老馬頭斜
漁陽風俗從今厚陳鄭芳名可並誇

風雨歎

日日日中風怒號時復雨電飛荒郊茅欄乍結未深穩
濕透席枕連弓刀大陰揚威炎暑斥青青好山如潑墨
弊裘不救須臾寒平地俄驚水三尺却憶江南向此時

蓮舟羽扇明纖絺夜來歸夢曾見之覺後尚續從軍詩

廢宅歎

纍纍壞墻如破甑百生不生荆棘盛華臺舞館遺故基
欲問何人人不知昨日開池得金釧猶想當時美人面
飛螢走燐畫燈紅殘鶯曉燕清歌轉地老天荒世運移
百年幾家如奕棋南山有樹兼有石舊宅平來見新宅

轅門曉望

曙色滿軍麾轅門縱目時星河收鼓角城郭露旌旗馬

踏荒園井牛衝野廟碑塗陽新入貢白霄舊名夷有勇
思三捷無謀效六奇前瞻遼水外烽火雜烟炊

營中閒夜

閒夜樂從戎將軍百代雄佩刀懸玉虎缸燼剔金蟲遠
析微侵月清笳迴帶風香騰鑪面紫火射箭頭紅舞劍
知書法談棋識戰功明朝將閱武傳令選調弓

西城一何高

西城一何高高高據山巔托基幸得所礮礪乃其然思

昔未版築頽墉陰寒泉狃嘯其下荆棘產其間百堆
靡寸錐羣黎無一全及茲事興復壯觀踰古先風雨屹
不搖虹電紛相連廣可輯萬戶遠當垂千年又辭明設
險詩篇頌城韓不覩南仲功寧知王教宣鱗鱗郡中居
青青塞下田懷夷貴施德報國在安邊同車或胡越耒
耜足戈鋌寄言乘障者采我芻蕘言

步出城南門

兀居苦無惊步出城南門直視何所見平沙接荒屯累

累十四墳昨有今不存問之何為爾墜發登城垣白石
為雉堞枯骸棄鳥鳶向來身外樽已作他人棺子孫流
徙盡誰復招其魂人生寄一世日望歸山原焉知百十
年變滅如浮雲山原未必安成廢亦難論路逢相知人
酌我雙酒尊且復與之飲悲傷復忘言日夕酩酊還擊
柝聲欲喧慙慙語成卒我豈故將軍

奉懷頤庵先生

遠埃起千里惻愴動中懷中懷何所思乃在黃金臺臺

上一美人獨宿無嫌猜氣息若芝蘭咳唾霏珠璣
予豈儔匹而乃志好諧昔者蒙縉締臨岐悵分乖
今也攘素腕援琴寫清哀清哀未能宣攝衣步前
階仰視明月光衆星為裴徊思履綦跡髴生綠苔
短夢無達塗寸辭愧長才投筆謝衾枕衷誠詎能
摧

奉懷

季夏鷹始擊溫風入庭除小人有所思君子在遠
途遠途途亦良苦王事迫簡書鐵馬嘶莽蒼霜刀
拂蜚孤昨傳

過建州分兵作前驅折衝更何人忠勇相與俱義分皎
星日戡暴力有餘安知非衛霍為漢却匈奴我蒙公所
愛繾綣魚水如所慚幕中士局促轅下駒遐征不能從
假此塗陽居凌晨望朝鮮夕夢遼城隅臨雲憶塞旗見
月思彎弧身遠而心邇遲徊以躊躇

塞上即事

自為沙塞客風物總能詳野望疆為帳天寒毳作裳雨
稀山韭短風熱地椒香澤蒜元誇漢

漢張騫始持蒜入
中國此名澤蒜

園桃或姓羌

胡桃亦名羌桃

酒邊歌白雀

白翎雀本鳥名此處有之因以名曲

馬

上射黃羊處處宜榆柳

二本甚多

川川可稻梁蝟毛如爪利

鹿角過人長

鹿音庀如鹿而長角

厓石青於羽戎鹽白勝霜

海子中產

鹽色白如霜

酥調粃子麪酪卧鹿皮囊

以皮囊貯酪激使之熟曰酪卧

沙燕

形同鵠

沙燕大而黑可食

河魚尾類魴性語瑩豆滿

瑩音勞野小豆也

味別苦葦涼

葦音蘗葦葦菜也

遍地皆紅藥當門種白楊上房

圍鼯鼠

鼯音奮如鼠而圓堆沙以爲穴開戶知風可取以食

穢壤轉蜣螂蚊少宵

眠著蠅多晝坐妨兒童能搏獸婦女不知桑戲作俳諧

體持歸詫越鄉

軍屋燕

軍屋初成燕來止口銜泥沙結新壘憶昨三軍未定居
燕燕依栖塚上烏軍今有城兼有屋燕亦來投軍處宿
但恐燕歸軍不見軍歸未歸看歸燕

紀行寄鄉中諸友

去年上天姥青鞵踏石苔路逢劉阮輩揮手使我回今
年客錢塘愛食錢塘水水清多天風吹逐行塵起塵飛

腰下劍影落劍池雲延陵懷季子句曲禮茅君舉頭見
天居星辰擁黃道翩翩飛將軍先我入燕趙燕趙三千
里王師百萬兵誰將雙白羽笑贈一書生揚鞭淦水春
挂席莊臺晚嚮來思親淚征袍為之滿行行過淮泗暫
泊項王城王城楊柳樹黃鳥弄新聲明發上呂梁洪濤
天上落持觴金龍祠瞬息彭城脚彭城接豐沛慷慨思
漢皇浩歌黃樓賦擊節三侯章好風獲兼旬歷覽遍齊
魯吟衝豫河烟坐對金臺雨金臺留一月羽檄動三軍

旗鼓朝朝見笳簫夜夜聞
乍思薊北門已涉漁陽外
不見萬里城但見萬里塞
發鞍松亭口飲馬寬河陰
寒雲薄日色曙霧結歸心
惠州又白霄意倦思少息
登高望海山遠樹霞光赤
時時攜小校孤嶂讀殘碑
行處翻如夢回來却自疑
所懷故鄉人縹緲越天末
相見同我懷分明照秋月
題詩及行役念往愧飄蓬
待教涼冷後封寄向南鴻

夜坐懷錢塘友人六言

過却山山水水不知暮暮朝朝笑我塞中看月憶君江
上聞潮

續蒼蠅賦

陶唐子適乎白霄之野止乎塗陽之山月在弦矣斗插
未間出則接乎戎旅入則事乎觚翰天高地寒炎暑不
干晨昏若秋正午暫暄私竊自計產于南荒畏處朔土
今則備嘗其寒不知有暑車馬而嬉衣裳而處無坐甌
之憂而有不簦之娛矣豈非幸歟何物蒼蠅百千其羣

自寅及酉營營紛紛勢同乎蟻螻聲震乎秋蚊尋馨投
光靡隙不集既引類而招朋或揚眉而鼓翼周匝乎櫺
檻徘徊乎几席其點污也則在白加黑因朱為蒼紈袖
洒松滋之墨烏巾著齊女之霜其攻錯也則穢我漣醑
敗我醇酎淋漓我餅罌傾伺我罍漏三牲之味八珍之
養紫駝之峯玄熊之掌已先飫其所享矣其附於人也
則不蟲而創不蠱而螫撲面緣眶翔頤咂頰或升領而
拂髀或穿袍而入臆或盤辟乎介冑或從容乎履舄使

人目眩顛汗神昏氣塞白羽捲於飛搖蒼頭罷於拂拭
甚則投筆而輟書對案而忘食雖有千鈞之弩萬夫之
勇亦無所發其機而陳其力也下則牧豎嗟咨圉人太
息犬彘為之回皇馬牛為之辟易究其所患盖未能一
二而悉焉迨夜參半夢一童子黑幘青裙趨蹌翼如張
目吐氣揖而謂予曰吾乃見垢於子者也子固善垢吾
實何辜子不聞乎衣垢而秦蠹蝨肉腐而生蟲蛆醢鷄
麥鵝理固自如向也茲地蛇虺之宅狐狸之區烟火蕭

條草生郭郭死骨蔽野羶裹所都此吾徒之所經營而
恣睢者也今也茲地師環其疆士卒暴露區洩井竈錯
雜無序郊野為運釀之衢川原納人畜之汙方版築其
未完亦何有乎室宇此吾徒之所乘時而繁庶者也子
姑待夫民神奠居邑屋完固鳥獸蟲豸咸得其所白露
為霜北風其涼于斯時也吾則斂翅鼓腹委身於無何
有之鄉矣子豈久寓於此者哉吾豈久溷於子者哉余
乃恍然以驚惕爾而寤河沉月墮起而續歌歐陽子之

賦

六月望寓寧軒對月

好在塗山月如何看不歸枕添連夜夢人著向秋衣
刁斗聲偏急星河影自微王師千里外縹水欲塵飛

唐愚士詩卷一

欽定四庫全書

唐愚士詩卷二

明 唐之淳 撰

憶吳越風景

最憶吳中與越中
四時風物總相同
夏田苗麥雲頭綠
秋水荷花酒面紅
調馬岡前看夜月
呼猿洞口納天風
于今忽作邊城客
白草黃沙兩鬢蓬

最憶吳中與越中
千崖烟雨六橋風
歌傳桃葉圍紅袖

酒熟松花注碧筒山面城池高閣繞水心亭院小船通
于今忽作邊城客辜負滄浪一釣翁

最憶吳中與越中一江潮水限西東當壚村媪高頭髻
出港菱船小樣蓬鱸切銀絲開臘酒飯抄雲子芼秋菰
于今忽作邊城客飽食黃羊斷野葱

最憶吳中與越中黃梅時節雨濛濛松間採朮尋真侶
竹下分茶立小童千頃白雲丹井月數行青紵酒樓風
于今忽作邊城客破帽戎衣逐塞鴻

最憶吳中與越中千年遺跡見高峯山陰道士籠鵝帖
笠澤仙人射鴨弓六寺烟花迷遠近五湖風浪錯西東
于今忽作邊城客得失應期問塞翁

最憶吳中與越中好山相映翠溟濛桃花鷓鴣三春雨
萼菜鱸魚九月風李白酒船尋賀老林逋鶴塚問蘇公
于今忽作邊城客矯首南雲歎轉蓬

最憶吳中與越中山樓月色野亭風江湖魚菜時時有
村巷桑麻處處同旋折藕花行酒令細書蕉葉送詩筒

于今忽作邊城客歸夢常飛東海東

大寧雜詩

正月丹符出紫宸三軍萬里淨邊塵
天垂平野星辰近地入皇圖雨露新
已見城池開道路早聞禾黍變荆榛
燕然賸有磨崖石留待班生頌聖明

邊頭極目正漫漫隨處平川似海寬
地勢北來通白雪塞塵西去接烏桓
冰霜山谷千秋雪風露衣裳六月寒
故國老親知念我憑誰傳語報平安

城郭迢遙雉堞危
新添四面壯威儀
日華煖映青油幕
雲氣時分赤羽旗
塞口古河非禹跡
塚邊荒寺有唐碑
正南回望家山遠
挂席三江未可期

六月二十二日雨

永夜風翻海
終朝雨蔽天
乍醒猶有夢
多冷却思綿
白浸千秋雪
青沉萬竈烟
惟應洗兵馬
喜氣溢山川

茶熟詩成後
香燒睡起初
幾回聞塞雨
何處得家書
雲擁門前岫
泉添井畔渠
漸看生意滿
早晚食園蔬

始食菜

胎牽青陽初結車朱夏末絕塞饒風沙秋聲無時發僕
本吳越士懷歸若饑渴況乃藜藿姿羶食非所悅當庭
播嘉種日夕遲其茁甘雨從東來夜氣亦旁達勾萌既
膚寸顏色轉葱鬱朝來芼吾羹風味不可奪未論五內
駭已畏七箸竭津潤生齒牙精神及毛髮道固希為珍
物有微見拔由來盤中飧豈是塞上物從茲慰羈旅灌
漑自無闕博矣天地仁永願充採掇

對昏鏡

白髮新添十數莖
苦為看鏡太分明
如今喜得青銅暗
紗帽籠頭照不成

嘲破帽

風吹帽破不中修
葉葉烏紗笑黑頭
莫待學來弓馬熟
還家換取鐵兜鍪

晚步菜畦

雨滋沙土作青泥
蘆葍蔓青各自畦
今日無風天較暑

紵袍蒲扇覓新題

晚見胡蝶

晚風庭院蝶來頻
可是多情慰遠人
亦欲種花留蝶住
塞天寒冷不禁春

晚望奉懷軍前公相

馬嘶何當還鶴望
亦已久道遠捷報遲
天涼秋氣首沙
風動百草城月照高柳
心隨土河流迤邐達遼右

榆菴記

菴之名始于漢許慎說文不載其事或謂作閭古諒閭之閭讀如鵠皇甫規傳言規為將親入菴廬省視士卒蓋菴之字從草庵聲又掩之省也古者師行止頓大則為壘障小則為營塢信宿則張幕幔持久則縛草為菴廬以處焉周宇文憲令永昌公椿代栢為菴此又示敵以甚久者也近世學佛者取以名其居而菴之名遂泯其所自出亦可慨也已今年夏余隨軍塗陽既雨閱月懼夫秋高塞寒復構小室為塞向墜戶之制地多產榆

足以充用自是掾楹梁棟皆掄也其上則覆草加土以障風雨倣宇文故事題之曰榆菴因竊自念方今王師百萬烜耀朔土以開我疆宇天子公卿謀議於上將帥百執事奔走於下智者獻其策武者效其力河南北平山東西之民具舟輿載餼糧水浮大河陸出松亭以給士大夫於數千里之外山川鬼神莫不震疊而吾也不能出一謀効一力手不知弓身不識甲猶且挾冊以吟安坐而食者果誰之賜歟夫掄之為木挺立而不倚介

也羣處而不疑和也雜施而不遜才也堅緻而不柔剛也取火以應候時也介以立之和以處之才以周之剛以決之而以時出之斯菴之名其足以警矣或謂予曰是木也易蝨以壞有若不足稱者何必菴菴於此哉答之曰是菴也容吾之身禦吾之寒足吾所寓之日而止矣彼梗楠豫章之居其能保夫久而不壞乎因識斯言于壁

塗陽八咏

金山積雪

積雪不知年
炎天生晝寒
南人初出塞
渾作玉屏看

富谷晴雲

溶溶谷中雲
西來復東去
雲歸人未歸
朝朝望雲樹

蕭寺曉鐘

朝聽蕭寺鐘
暮聽蕭寺鐘
當年鑄鐘者
陵雲起秋風

玉川秋草

川上王孫草
秋風幾度黃
太平休戰伐
邊樹射黃羊

溫泉煖浪

玉女來浴時丹光落秋水到今尚溫溫煖浪因風起

土河夜雨

滉漾復滌滄分明見底清塗山一夜雨流水惠州城

西峰夕照

西峯含積陰落日載暝色照見獵歸人揚聲下沙磧

東庵春嵐

雲破始見日雪消微露嵐馬頭春夢裡驚道是江南

北平白先生并四公子以詩文見寄喜而有作

先生詩篇漢魏體公子文章雲錦才
一千里外相憶處六月盡邊方寄來
乍驚軒窓燦星斗已覺懷抱消塵埃
安得凌風綠玉杖共醉秋月黃金臺

立秋日

炎曦留徂夏金候應初秋烈風無時作
星火西南流自我違上國歲月忽已悠
匈奴未克夷王師為淹留宵眠枕干櫓
晝食親戈矛伐榆結菴廬采菽充乾餱
詎無飢

寒念遑恤為安謀所懷藥蘭北遠在金山陬列營正碁
峙鼎釜尚魚遊賁育奮其武樓陳壯其猶將畧貴持重
皇心在懷柔但俟銜璧至焉能事窮搜鳥獸尊鳳麟列
邦必宗周寄與同征者薄勞當永休

秋日雜題

月沒荒城曉角催風清平野暮雲開射鵬都尉分弓去
殺虎將軍奏捷來

蠨蛸塞外風吹雨雞鹿山頭露欲霜為恐寒鷲慈母線

起來先著舊衣裳

一泓清水古時河洗馬歸來飲橐駝不信邊州住多日
胡兒頭唱漢兒歌

深帽胡鷹綠錦韉高蹄駿馬玉雕鏤向人意氣爭馳獵
欲取沙場第一籌

自為邊客早知秋聽得秋聲起別愁野粟垂花羊乳子
一年多半在幽州

處處蕭笳接旆旌時時風雨送秋聲紫駝白馬三千帳

野草荒烟十二城

三月邊城沒酒嘗
朝朝飽飯索茶湯
有時吟苦心如醉
吟得驚人似醉狂

萬里歸心折大刀
三軍何日解征袍
不如歸喫南中飯
綠芋紅鱗紫蟹螯

題秋山曉霽圖六言

藤杖高縣曉日筍
鞦韆軟踏秋雲好
拉鏡湖賀老同尋句
曲茅君

奉懷北平莊上將出關者

使到燕臺好趣裝馬蹄何日遇灤陽捷書已報還師近
歸及秋原草未黃

出關容易入關遲久客尋常恨別離昨夜燈花開半朵
也因相見不多時

七夕

江南遊子遼東客元夕辭家今七夕塞中烽火幾回看
園裏嘉蔬三度折今夜月色天下同牽牛織女精靈通

烏鵲橋成夜光濕黃姑渚落秋機空再拜持觴問牛女
乞取河流化甘雨淨洗天兵歸內府萬歲千秋奉明主

客睡

客睡渾無寐歸心況入秋月色圓又缺行色去仍留多
病非關酒長吟不破愁家書空寫徧無計達南州

富谷驛雨過

晴時上馬雨時歸馬上看山失翠微七十里程三度水
不逢蓑笠盡羶衣

金川先生集
卷二
別大寧

七月十五日發大寧以下皆道中作

十二城中百日留來逢初夏去逢秋
塗山今夜團圓月猶送清光照馬頭

雨宿石洞

道傍石壁高崔嵬上有空洞玲瓏開
我行遇雨今寄宿天氣黯黯雲徘徊
洞前秣馬洞底卧蝙蝠飛來虎狼過
滴瀝微聞谷溜鳴凌兢恐踏雲根破
夜深雨逼魂夢寒意是物外非人間
僕夫未眠告明發回首但覺蒼然山

神仙驛曉發

川光連莽蒼曉氣入空虛烽火清平際城池喪亂餘馬
語來路熟人憶異鄉疎記取平戎事歸煩大史書

寬河城夜宿

新城聞鼓不聞鐘一夜潺湲瀉碧峯頃報入關多好夢
明朝應到喜相逢

入關

六王川上風如獵九公嶺頭天似秋欲知地氣分南北

減却衣裳入薊州

宿松亭關有懷松軒公子

獨行無所語公子在何方不作邊頭客仍居谷口莊
山川欣自慰書信好誰將今夜松亭夢琴尊興甚長

薊州逢頤庵先生及四公子

以下皆
薊州作

四月睽離一日逢漁陽驛裏薊門東更相存問兼相遇
若箇傷離有瘦容

又和頤庵見貽韻

自別金陵笑語稀中途相見得相依也知幕府無多客
共候將軍幾日歸

荊州官署松鶴得城字

公館闢軒楹長松有鶴鳴色兼秋共迥聲與月同清花
向吟邊落苔從舞處生吏歸門半掩不道在邊城

登崆峒山謁崔府君廟得暉字

杳杳祠宮壓翠微團團庭樹下晴暉石幢薜葉垂秋露
畫壁蛛絲織夜機駿馬頻嘶知路滑馴鳥不動覺雲歸

欲尋往事題名姓白髮殘僧記憶稀

登獨樂寺觀音閣得聞字

層級帶城雲仙凡此地分野花為佛供庭栢當爐燠雨
壞簷前鐸蝸添石上文憑虛應領妙亦足破聲聞

分題得垂絲槐

葉如江上柳枝長花比巖前桂子黃自笑不隨秋試去
却騎戎馬入關忙

鶴夢得人字

夢隨明月下秋旻
斂翅凝眸若有神
偶到洞天經赤壁
舟中逢著姓蘇人

登薊州城樓得園字

塞北城當薊北門
三河流接九河源
霸圖已逐秋雲遠
節制新添虎衛尊
幾處桑麻思樂業
千家砧杵靜朝暉
此時天畔登樓望
眼入西風憶故園

香林寺尋僧不遇得霞字

門掩北城霞庭空
駕鹿車留題分貝
葉汲井落藤華不

繫元無住忘生詎有家雲歸占杖錫人到禮袈裟石響
惟聞溜燈明不礙紗徒勞諸弟子香飯進胡麻

八月二日漁陽驛觀降王入朝得青字

此地降王歟聖明千麾萬馬自龍庭百年王會開圖畫
一代衣冠見典刑兵氣晴連遼水白路塵秋染薊峯青
佇看大史褒皇化不但燕然為勒銘

槐亭得長字

剪翠納天光因枝結棟梁月翻蒼雪冷暑借綠雲涼戶

密鶯窺慣簷卑客到妨不同穿蛭穴詩夢入秋長

候國公旌旆未至得春字

遼海無波氣色新
路人久已望車塵
曉聽烏鵲心先喜
夜卜燈花夢轉頻
已見單于來款塞
亦知天子絕和親
幾時旌節歸臺閣
共祝皇基億萬春

重游香林寺得游字

廢刹委荒丘
重來是薄游
詩因靈輟賦
衣為大顛留
榻煖深宜晚鐘清
迥得秋細思
關去住欲別更須謀

寄香林僧得聽字

日斜人散鎖寒廳
羈思詩愁兩不醒
輸與山僧無一事
白蓮花漏六時聽

松梢月色得西字

鶴枝不動兔輪低
蘿逕無多影欲齊
吟到斗橫河漢落
殘光猶在畫牆西

喫秋桃有感

看得花開到熟時
一年多半客邊陰
明年秋摘知何處

重到劉郎未可期

觀薊州文廟秋奠

畫戟門開兩陛嚴
銀河不動夜厭厭
儒冠曉逐文星集
教雨秋隨湛露沾
樂備鼓鐘明燎火
禮陳犧象列形鹽
皇威聖德同無外
絕塞偏州喜具瞻

薊州觀市集

九陌動秋煙
千區列土塵
物情占貴賤
人語雜幽燕
酒瓮黃梁博
柴車黑犢牽
自驚重出塞
聊為買長鞭

薊門秋色得消字

秋色望中消黃微伴碧寒陣邊窺萬騎獵處落雙鷗雲
白初翻海虹銷半掩橋已今添客恨仍值雨休朝

聞國公重鎮大寧得雲字

秋風吹角動三軍入塞聲為出塞聞後隊隔山旗面改
前驅傳令馬頭分朝廷未下還師詔幕府重書諭蜀文
自愧身輕如野鶴一年來往逐邊雲

謝姬太守惠鶴

借來公館作齋居復有仙禽伴讀書每送清音當五夜
時隨閒詠及三餘啄殘苔徑和烟掃舞罷霜翎帶月梳
明日南還須愛惜筠籠輕貯入籃輿

中秋夜燕集

白雲破秋色飛蟲起商聲漁陽明月夜鐘鼓悶寒城城
寒逼塞門擁馬蕭蕭鳴及茲展良會座客欣合并飛觴
接軟語鶴髮間華纓明河西南瀉列宿正縱橫雖非帝
鄉見稍慰羈旅情木落長白山霜飄大寧營上公未旋

旆我輩當遐征且盡今夕樂戎車有嚴程

又次頤庵老丈韻

崆峒山前夜看月月色秋空兩奇絕不知何處爛銀盤
飛上嵯峨白瓊闕蟋蟀啼霜秋氣悲烏鵲遶樹人思歸
天南有星千萬點離恨不敢分明窺亭亭長松古堦下
松枝無聲露飄洒倚松踏露勸解公手中偏著青瑤竿
願公飲此壽百千樂如食蜜無中邊四夷不驚風雨順
月光如鏡長團圓匣底龍泉玉三尺英姿自可千金值

酒酣拂拭試舞之虹光倚天如月白今宵之樂當奈何
自古漁陽豪傑多臨風更賦漁陽歌

訪馬叅卿得微字

公館秋清坐不歸酒卮茶盃送斜暉相逢盡是天涯客
且借桐琴奏式微

送松軒公子之大寧

玉殿承恩日秋風出塞時山川開道路書劍逐旌麾文
雅時賢惜聰明聖主知鵲鷁原上望莫遣馬行遲

四牡去駸駸來鴻送別音塞雲低晚色關日下秋雲篋
有新題句囊餘舊賜金空同今夜客去住兩關心

送袁公子省親大寧

共是蟠山客我歸君出關別愁多夜月詩思減秋山野
淨風烟斷天清士馬閒庭闌開幕府亦足慰親顏

送高公子還京師

燕山九月沙草黃曉河浮水天雨霜狐裘烏韉騎馬郎
馬蹄踏踏歸帝鄉黃金臺前新酒香子須先嘗我盡觴

半年同客情難忘白日聯鑪夜共床笑談在耳書在囊
子今去矣誰翱翔北來鴻雁斜作行河中鯉魚三尺長
我未得歸心獨傷子肯寄書魚雁將

八月二十四日遇國公入奏得星字

仙槎八月赴滄溟永夜三台動使星身上賜衣金虎面
馬頭飛箭黑鵬翎威光已接恩光近秋氣還連劍氣腥
誰道驛亭閒白晝却瞻斧鉞上青冥

題衍斯道詩卷後

自八月二十六日入北平城以下並在湛露府中作

二十年來老輩稀
白頭僧見說當時
西風落葉前朝寺
讀遍燕山一卷詩

首首開元大厯間
月中星瀑雨餘山
自緣嬾寫勤看咏
欲得從師借不還

北平學觀石鼓

八月二十八日

郡學舊辟雍中有岐陽鼓
古今所聞十左右各惟五
離離大星隕兀兀壞雲補
累累營竈滅落落陣沙聚
質若切玄玉制若覆冷釜
氣若鎔五金文若斷釵股
孤峯割

秋瘦千鷗摺春嫵森嚴列戈矛爾雅冠章甫厓水溜靜
懸海煖浪掀舞催輶半折軸敗舫或遺櫓小龍彭蠡歸
大鵬扶搖舉斷苔明翠錦古墨漬潤礎思昔委秦郊雷
電驚草莽來牛礪其角鑿臼加以杵幸令依聖宮星日
照廊廡圭壁遜其光俎豆與之伍脫非天意存或是明神祐
深簷白晝永老屋祥鸞翥晴連畫戟陰冷濕宮墻雨諸生
獲講解髦士資訓詁啓鑰煩豎閣碑本利商賈韋辭表
姬周韓語懷李杜雄章迭鏗鉤遺恨寄酸楚紛紜歐蘇

作詰屈韋鄭譜雖靡定彷彿詎非慕隆古鯁生千載下
匏繫三江潁神徒馳周南足不出城府適從遼碣後遂
作幽燕旅平生慕竒聞一日獲佳覩初臨色愈莊欲狎
氣斯沮如親至東都揖讓申與甫如親與田獵搏攫兕
與虎如虛藜覓腹享大牢肥豕如洗蟬蛸耳聆笙磬祝
敵羈愁破昏憊喜氣決眉宇時維躔壽星歲甲在疆圉
天寒號鵠臬城荒茂禾泰宗周本余懷覽古亦天與摩
挲重圖訓蹙蹙愧庠序聊陳曹鄴風式繼韓蘇武

九日得鄉字

薊門秋月猶在眼燕臺九日仍舉觴
病翁同舍喜無恙
公子出關情可忘
鏡中頭髮忽欲白
堦前菊花空自黃
試開懷抱取一醉
莫為音書牽兩鄉

月橋晚步

鳳沼龍舟事已湮
月橋烟島畫生塵
芙蓉冷落菰蒲老
波面游魚却避人

兩樓鐘鼓自西東
野水長天夕照紅
一片閒鷗飛盡處

數家茅屋酒旗風

過高麗寺又小高麗寺

金銀畫壁謝觚稜
中國人留外國僧
今日寺存僧去盡
淡烟明月是香燈

繫馬荒宮讀古碑
寺名猶識小高麗
傷心莫問前朝事
吹落椒花見黍離

謁關侯廟

廟在海子月河橋之西
嘗感於夢中重為修

綠柳蒼松取次栽
靈旗風煖廟門開
百年遺構重修處

曾得親王入夢來

奉和松軒公子敬受鞍馬鷹鷂之賜

沙塞得風霜王庭被寵光
錦韝鷹眼疾玉勒馬蹄香
搏擊當思奮驅馳未可忘
恩榮有如此知爾繼岐陽

殘菊聯句三十韻

佳節忽如遺殘菊凍猶綻
深黃媚秋清白淡碧留日晏

微微霜粉傳唐滴滴露珠間
餘馨不盈匊白短幹纔過

骨灌頻畏色損唐愛重疑景幻
紛披藉援扶白灼爍資

茗澗凍蝶隔幔窺

唐

寒蝸緣徑綰叅開星鼎峙並擢子

雙孿霞翻日炙殷

唐

襖絢雨披幔荆鑄玉一圍

白

沙揀

金千辦巡防閨婢摘

唐

移恐園翁訕衰思還丹駐

白

媚

得粉黛扮風前醒醉眸

唐

月下影童冠優游奈晚圃

白

蕭爽宜夕間悠然陶令思

唐

佚以魏公宦飲甘制積齡

白 佩臭却沉患屈辭食豈真

唐

蘇詠落非屢茹苗嘗雜

杞

白

護本當去亂聊供開口笑合作青眼盼蘭茝本同

方

白

松簞須共泰色連芸帙淨

白

陰動緗簾慢炎涼飽

所歷

白

文酒陪之慣寧為抱枝乾

唐

不作裂車轅幸茲

異鄉對

白

庶使羈愁鏟時冬改商律

唐

授服補新紵莎

階已罷蛩

白

榆闕久來鴈親如蝻付羶

唐

戀若馬舐棧

有田惟種秫

白

無麥不為麴百篇詩已成

唐

千斛醕可

辦君毋蠹花妖我敢思筆諫

唐

和荅衍斯道見貽

五色雲緘喜自開驪珠遙帶佛香來孰知近處無靈轍
可信前生是辨才白馬秋清陪鶴駕貝章風靜啓蓮臺

飛虹橋下重尋日煩具鄉山綠茗杯

送袁公子回濟南

遼碣幽燕去遠征那堪送別在燕城居庸風色盧溝月
併作離亭一夜情

送黃大舍回山東

白霄漁陽又北平時常同住又同行于今忽送山東別
兩地相思共月明

暫宿八魯莊夢顧庵公獨宿城中

偶因送客入城遲舊院空牀旦宿時夜半月明山鶴叫
猶疑西閣共聯詩

為留人陳子新賦松隱

昔隱穀城山結巢松樹間巢深雲氣密常有好奇顏一
從離隱所雲袂飄飄舉手中五粒花服食生毛羽五年
在淮南十年在燕城安知赤松子即是安期生朝縣白
玉壺夜鍊芙蓉鼎春風熟杏田秋雨鳴丹井井香田有
歲人壽已長年山中猿鶴怨遲爾亦未延

漫翁禪師枉顧寓所適送友未還明日以詩奉謝
出郭餞所知行軒枉禪伯笑談詎無人悅恨余方積城
寒雨柝迥月出霜鐘白宵長夢轉孤跡踈心自密浮雲
本無期一念即命策

題劉道權寓雨後雲林春山蕭寺二小幅

自九月五日遷

文明門新寓以
下皆寓中作

榜船楊柳根雨罷溪水響深林人未還白雲自來往
寶殿插峻嶒松門半古藤日斜鐘磬發應有未歸僧

和頤庵翁贈窗下菊韻二首

半宜晴日半羞寒得近公家十二闌
好覓畫人傳色樣
黃金新鑄不曾乾

膩黃殘綠底禁寒移傍書帷更作闌
自是愛深看養別
向陽澆灌不教乾

燕山八景

薊門飛雨

出自薊北門試尋桑乾源飛雨四面至
河山為之昏高

有營隲處驚沙走積垣下有戰死骨白兼沙土痕奔淥
萬雷喧赤石孤電翻詎知蒼茫際神明悼其冤驅車過
古城瞑拉翁投村解衣燎新火松亭已升墩

瑤島春陰

王城古帝都宮闕宏且麗中有千仞峯岩堯壓幽薊念
昔推鑿初本自人力致燒蜃插文石竒功奪天地蛟鸞
失其儀濤岳遜其勢況當靈雨餘葱鬱藹生意深留雲
霧陰潤聚圭璧氣忽聞桑扈鳴君王思秉耒

太液秋風

靈源道天潢，滉漾裂厚坤。邇茲日月輝，星宿江吐吞。其
深產菱芡，其淺秀蘋蘩。蘋蘩以共采，菱芡以侑尊。事殊
漢昆明，派匪華清溫。時秋風露寂，玉浪芙蓉翻。行宮罷
夕月，蘭芳菊揚蓀。願同靈沼魚，煦沫生成恩。

盧溝曉月

侵星度輿梁，落月溝水上。月光金鏡側，梁影玉虹樣。照
人跬步間，光怪百千狀。得非夸毗子，持此為譎誑。意欲

塵珣琢寸刃不可向日出塵霧黃馳馬雜車輛喧靜猶
晝夜循環不須讓梁石有時泐泉流無得喪

居庸疊翠

駐馬居庸關仰瞻軍都山山深關隘險石角泉潺湲昔
之巡幸跡今乃莓苔班尚遺千丈嵐蒼翠不可攀朝隨
飛雲出晚逐歸鳥閒片陰雨三尺一日四序環北顧道
阻長風沙正漫漫內華而外夷慨然起深歎

玉泉垂虹

羈束戎馬間佳勝每虛歷及茲臨玉泉垂策任所適仰
瞻飛竇瀉玉流粲瓊液俯目視修梁縣虹飲春澤從龍意
徒在為雨功未畢思昔未亂初游賞隘泉石浮華等烟
電歌管化荆棘臨流歎遲莫瞑樹起秋色

道陵夕照

房山秋氣深陵寢久蕪沒羊馬穴蒼鼠麒麟卧秋月淒
涼雄圖盡寂寞王氣歇空遺夕照明遙瞻孤鳥沒有祠
山之傍聖代重先烈鴈魚固無靈蘋藻禮不缺側聞三

史統南北五馳突董狐無其人於此一慘怛

西山積雪

維西有崇山其上太始雪天風吹不消海日照還結疑
是仙子居瑤樓夾銀闕白榆種成林瑤草紛可悅我遊
值歲晏寒風為騷屑斧冰澗底泉敲火石上月道逢獵
歸人歌笑變凜冽川長狐兔淨旗颭鼓聲咽

舟中生日

十月十三日是日大風以下並舟中作

客裏逢生日舟中況苦寒家人具湯餅童子獻蔬盤風

送歸心切天長望眼寬
唯餘親友念此日轉無端

直沽口占

一年長客旅卸馬復登船
碣石山東面黃河水北邊
形容容消霧雨行李得風烟
更作南還韻山川信有緣

送仲權百戶之山東兼問薛正言

薊門同看月汶上獨登舟
風雨青燈夜旌旗玉帳秋
乍分偏憶舊久客會禁愁
若過萊州驛煩君問薛收

河西驛

午辭潞陽城明發河西驛寒雲遶蒼茫回雪舞虛白飛
鳥不得下驚濤暗相射停橈散水華依擬避風力暖浪
換春酒盃陳十拍直翻思出塞苦寒氣殊未極馬毛山
蛭縮人面深墨黑幸此舟楫安高枕候霽色

滄洲

雪河浮長冰沿轉見絕岸人烟市集稀燈火舟楫亂漁
人扣舷語篙子中夜飯水宿有常程回首歲月晏龍卧
江海冷石出梁路斷晶熒雲表星慘切煙際鴈驛鼓咽

不舒天鷄曉相喚鄉山夢中來塗回未能半

德州

德州俯要衝地當舟車會浮梁直郭門亦以司啓閉東
南出齊魯西北達幽薊人民屋室稠商賈語音異聞此
古陵縣側塞隈風氣置牧超等秩自我聖明世戍兵三
千人將校十數輩河山為之雄城郭為之麗我來臧戎
艦登覽不暇備譙樓角聲動小卒催鼓柝

甲馬營

長河抱曲洲河轉洲面窄前瞻甲馬營近可半舍隔水
傍一鰕魚腹剖尾正赤知是獺所祭餘餒遺人食後夫
取以至令我三歎息自我去桑梓海月十掛壁薦奠誰
其尸蘋藻空自碧食魚感時序行矣望鄉國

臨清閘

長舟走浮梁雙槳如鳥羽今日復何日欣然慰羈旅所
忻遇我公使節還天府文章為冠佩仁義作干櫓鏗鏘
燭下詠脫略酒邊舞碩慚蜀嚴幙賓客非杜甫寒生臨

清關白日欲亭午淹留當異途躊躇起淒楚

東昌府

夜深抵聊城城寒鼓聲四缺月翳復出人影霜在地繫
船驛亭樹門閉久無吏邀呼其縣官如見燈火至披衣
待明星忽遇南來使手中尺素書上有平安字慙慙老
母念懇款故人意緘封秋氣始展對歲欲季回思萬里
別喜極繼以泪聊為數刻畱拂曉悵分袂

十月二十一夜次甲馬營遇我公使還遂登舟


陪至東昌行三百里餘公出示願庵先生及公
弟松軒見寄詩喜賡其韵詩凡四首其一以識
邂逅之遇其三以答願庵松軒金臺同寓之情
云後四日安山湖舟中記

不奈寒侵季子裘忽驚同載李膺舟使星一點依南斗
肯作聊城五夜留

內牆陰處月橋西記得聯鑣覓故溪千里北風成悵望
幾時南客重提攜

琵琶山人白髮翁金玉文章冰雪容鳳凰臺下時常見
野鶴羣中不易逢

錦袍公子最多情每許山人並馬行今日獨乘官艦去
却瞻馬首曳心旌



唐愚士詩卷二